

## **‘Na spica virdi**

‘Nta un càmpu di spichi duràti,  
cu dritti, cu piegàti, accarizzàti  
di un vinticèddu di sciròccu,  
stritti ‘nta ‘na frinètica danza,  
si senti lu càntu di milli cardellini,  
la sinfunìa di milli viulini.

Tra iddi, nnì scuprivu una ancòra virdi,  
piegàta comu si s’affruntàssi di mia,  
di lu mè tattù, di li mè carizzi.  
Mi la vulissi pigliàri, ma nun pòzzu.  
La lassàvu unn’era pi puntigliu,  
comu cci passu arrè la pigliu.

Cci ripassàvu dopu. Ddu campu  
di spichi duràti, fu tuttu mitùtu,  
lu cori si strincè, li mani trimàru,  
l’occhi si vagnàru, dda bedda  
sinfunia, nun si senti cchiù,  
dda spica virdi ... nun c’è cchiù.

Caminànnu tra timpi sicchi, stancu  
e avvilùtu, tra cadùti e ghisàti, parsi sèntiri  
‘na vuci sussurràrimi quarchi cosa. Mi giru,  
vidu la spica virdi ‘lluminàta d’un raggiu di  
suli,  
cu attòrnu una, centu, milli viòli.

Mi piegu versu d’idda, la pigliu,  
la tègnu ‘mmànu. Haiu di diricci tanti cosi,  
ma, aspèttu a idda ca mi dicissi di putilla  
sfugliàri, di gustàri li sò chicchi, di manciàri  
lu sò priggiaùtu granu,  
duci-duci, accùssi ... pianu-pianu!

Un forti ventu di maistràli,  
si purtà dda spica virdi.  
Ti nnì jisti accùssi .. senza fari rumùri  
prima ancòra ca nascissi ‘n’amuri.